



*Senin, 13 Maret 2023*

**Ogen: Kejadin 41: 51-52**



**Erti Kiniseran**



**S**ura-suranta adina banci i bas kegeluhen enda ola min lit kiniseran, perbeben, persoalen. Adi banci kerina min erdalam bagi sura-suranta. Bage siakap maka meriah. Tapi la sisedari, ban litna perbeben si jadi e kap maka lit dalanna nggejapken uga nanam kemalemen ate pulah arah perbeben e. Bagi syair lagu Karo "kiniseran dalanna kite-kite ku si jore" Kiniseran e lebe sinanami e maka nggejap kita lit kelegaana entahpe jorena. Bali katana adina lalit pagit, la sieteh nanam masin, macem, ntebu ras meser. Penggejapen si pelain-lain e si dat ban enggo sinanami erbage-bage si berbeda. I bas minggu passion enda iajuk kita ikut nggejapken kiniseran Tuhanta Jesus. Erbage percuban engkenai kegeluhenNa. Tuhanta Jesus Kristus mulai kin geluhNa i doni enda seh mateNa la terlepas i bas kiniseran. I je me kemanusiaanNa iuji. Sabap diriNa 100 % manusia, 100 % Dibata.

Jusup ncubaken ngidah rancangan Tuhan i bas kegeluhenna. Erbage kiniseran enggo ibentasina asum ia ras senina-seninana i bas rumah bapana Jakup. Tantangan arah senina-seninana si erbanca ia tetap megegeh guna seh leben i Mesir. Kiniseran si melala i Mesir naruhkan ia jadi wakil raja. Tek ia enda kerina i bas rancangan Tuhan. I bas jabuna pe iertikenna kerina kiniseran e arah gelar anak-anakna. Anakna si pemena ibahanna gelarna Manase ertina erkiteken perbahanen Dibata enggo lupa aku kiniseranku ras keluarga bapangku. Anak sipeduaken ibahanna gelarna Epraim ertina enggo ibereken Dibata man bangku tuah i taneh kiniseranku.

Selaku kalak si tek pe kita megati ndatken kiniseran. Si jadi perenungen dat kita nge makna/ hikmah arah perbeben kegeluhen si man alanken i bas kegeluhenta enda? Kai nge si ban tanda nginget-ningetsta di kune kita pulah i bas kiniseran? Asum kita nginget kiniseran, minterlah inget kiniulin Tuhan.